



Na osnovu člana 30. Zakona o rudarstvu Federacije Bosne i Hercegovine („Službene novine Federacije BiH“, broj 26/10, u daljem tekstu Zakon), federalni ministar energije, rudarstva i industrije donosi

PRAVILNIK
O POLAGANJU ISPITA ZA SAMOSTALNO RUKOVANJE EKSPLOZIVNIM
SREDSTVIMA U OBLASTI RUDARSTVA

I OPŠTE ODREDBE

Član 1.

Ovim pravilnikom uređuju se uslovi, način i program polaganja ispita za samostalno rukovanje eksplozivnim sredstvima u oblasti rudarstva (u daljem tekstu: ispit).

Član 2.

Pojmovi koji se koriste u ovom Pravilniku imaju sljedeće značenje :

„**Eksplozivi**“ : u smislu ovih propisa podrazumijevaju se eksplozivi opšte namjene za rudarske i druge potrebe, kao plastični, semiplastični, amonijum-nitratni praškasti eksplozivi, plastične eksplozivne smjese sa dodatkom vode, eksplozivne smješe, rudarski crni barut.

„**Sredstva za paljenje mina**“ su materije ili predmeti koji služe za iniciranje (podsticanje) naglog sagorijevanja eksploziva. U ta sredstva spadaju sve vrste rudarskih kapisla i štapina, električni upaljači, detonirajući štapini i pojačivači eksplozije (busteri), nonel-cjevčice (konektori).

„ **Pomoćna sredstva za paljenje mina**“ smatraju se minerske čaure, minerska saća i sl. za jednovremeno zapaljivanje više štapina i usporivači.

„**Pribor za paljenje mina**“ podrazumijevaju se minerske žižice i slično, kao i mašine (aparati) za električno paljenje mina električnim upaljačima.

„**Eksplozivna sredstva**“ : su eksplozivi, sredstva, pomoćna sredstva i pribor kojima se vrši miniranje, tj razaranje stijena ili drugih korisnih mineralnih sirovina i drugih objekata.

„**Magacini (skladišta) eksplozivnih sredstava**“ su objekti u koje se smještaju i u kojima se čuvaju eksplozivna sredstva. Magacini mogu biti površinski, poluukopani, podzemni ili ukopani, rudarski jamski magacini i pomoćna skladišta.

„**Komora**“ je posebno zatvoreni dio prostora u magacinu, u kome su smještena eksplozivna sredstva.

„**Priručna spremišta**“ su privremena smjestašta eksplozivnih sredstava, izrađena u udubljenjima (nišama) stijena ili kao zasebni sanduci u blizini pojedinih radilišta, u kojima su smještena eksplozivna sredstva za miniranje za jednu smjenu.

„**Rukovanje eksplozivnim sredstvima**“ podrazumijeva manipulaciju (prevoz i prenos mimo javnih puteva), uskladištenje, evidenciju i praktičnu upotrebu eksplozivnih sredstava.

„**Palioc mina**“ osoba koja je ovlaštena za samostalno rukovanje eksplozivnim sredstvima .

Član 3.

Poslove palioca mina mogu obavljati lica zaposlenici, koji imaju:

- visoku stručnu spremu rudarske struke i imaju praktična iskustva o rukovanju eksplozivnim sredstvima,
- višu, srednju stručnu spremu rudarske struke i jednu godinu radnog staža ili kvalifikovani radnici rudarske struke (KV-kopač ili KV-bušač) koji imaju najmanje tri godine radnog iskustva na poslovima kvalifikovanog zaposlenika i položen ispit.

Član 4.

Pravo polaganja ispita imaju kandidati navedeni u članu 3. VŠ, SSS i KV stepenom stručne spreme, koji nisu mlađi od 20 i stariji od 55 godina, koji posjeduju ljekarsko uvjerenje da su fizički i duševno zdravi i sposobni za vršenje poslova palioca mina i da su izvršili praktičnu obuku u trajanju od 21 dan saiskusnim paliocem mina za što se izdaje potvrda od tehničkog rukovodioca pogona u kojem je kandidat zaposlen.

Član 5.

Ispit mogu polagati i lica koja nisu zaposlena u privrednim društvima koja se bave isključivo rudarskom djelatnošću (građevinarstvo, šumarstvo), a ispunjavaju uslove propisane članovima 3. i 4. ovog pravilnika.

II. ZAHTJEV ZA POLAGANJE ISPITA

Član 6.

Zahtjev za polaganje ispita podnosi se Federalnom ministarstvu energije, rudarstva i industrije (u daljnjem tekstu: Ministarstvo), putem privrednog društva u kojem je kandidat zaposlen najmanje na trideset dana prije početka redovnog ispitnog roka. Zahtjev za polaganje ispita podnosi pravno lice u kojem je kandidat zaposlen na obrascu koji je prilog ovom pravilniku.

Zahtjev može podnijeti i direktno kandidat ako nije zaposlen.

Uz zahtjev za polaganje ispita prilaže se

1. ovjerena kopija diplome ili svjedodžbe o završenoj stručnoj spreml kandidata,

2. potvrda o radnom iskustvu sa podacima gdje i na kojim poslovima je kandidat radio,
3. Ljekarsko uvjerenje za palioca mina,
4. Potvrda o praktično izvršenoj obuci za palioca mina,
5. Potvrda o uplaćenim troškovima polaganja ispita.

Član 7.

Na osnovu zahtjeva za polaganje ispita i dostavljenih dokaza iz člana 6. ovoga Pravilnika ministar donosi rješenje o odobravanju polaganja ispita.

Rješenjem o odobravanju polaganja ispita utvrđuje se vrijeme polaganja ispita, naknada za troškove polaganja ispita i mjesto polaganja ispita.

Ako se iz dostavljenih dokaza utvrdi da kandidat ne ispunjava uslove za polaganje ispita ministar donosi rješenje o neodobravanju polaganja ispita. Mjesto održavanja ispita je u mjestu privrednog društva iz kojeg kandidat dolazi.

Član 8.

Naknadu za troškove polaganja ispita snosi privredno društvo gdje je kandidat zaposlen.

Iznimno od odredbe iz stava 1. ovog člana troškove polaganja stručnog ispita snosi sam kandidat ako je zahtjev podnesen u skladu sa stavom 2. člana 6.

Član 9.

Ispiti za paliocce mina mogu se polagati za:

-Podzemna miniranja, koja obuhvataju sve radnje podzemnog miniranja u rudarstvu i niskogradnji.

-Nadzemna miniranja, koja obuhvataju sve radnje nadzemnog miniranja u rudarstvu i niskogradnji osim specijalnog miniranja.

-Specijalna miniranja koja obuhvataju:

-podvodno miniranje

-miniranje leda

-obrade metala miniranjem

-konturna miniranja

-miniranja kod seizmičkih istraživanja

Član 10.

Ispit se sastoji samo iz usmenog dijela, provjerom znanja iz poznavanja tehničkih normativa pri rukovanju eksplozivnim sredstvima i drugih propisa iz oblasti rudarstva, kako će biti navedeno u programu iz člana. 23. ovog Pravilnika.

Član 11.

Ispit se polaže u redovnim rokovima i to u martu, junu, septembru i decembru. Po potrebi predsjednik Komisije može zakazati i vanredni ispitni rok.

III. KOMISIJA ZA POLAGANJE ISPITA

Član 12.

Ispit se polaže pred Komisijom za polaganje ispita za samostalno obavljanje rukovanja eksplozivnim sredstvima u oblasti rudarstva (u daljnjem tekstu:Komisija). koju imenuje federalni ministar.

Komisija se sastoji od predsjednika, dva člana i sekretara.

Jedan od članova se imenuje iz privrednog društvo iz kojeg dolazi kandidat.

Član 13.

Predsjednik i članovi Komisije su diplomirani inženjeri rudarstva, koji ispunjavaju uslove za tehničko rukovođenje u rudarstvu i imaju najmanje deset godina rada u rudarstvu.

Rudarski federalni inspektor je obavezan član Komisije.

Predsjednika, jednog člana i sekretara Komisije imenuje ministar rješenjem na razdoblje od dvije godine.

Člana komisije iz privrednog društvo iz kojeg dolazi kandidat imenuje ovlaštena osoba privrednog društva.

Član14.

Predsjedniku, članovima Komisije i sekretaru pripada naknada za rad čiju visinu rješenjem određuje ministar.

Visina troškova ispita i naknade članovima Komisije se određuje na bazi troškovnika kojeg odobrava ministar.

IV. TOK POLAGANJA ISPITA

Član 15.

Ispit kandidat polaže usmeno tako što odgovara na pitanja iz programa utvrđenog čl. 23. ovog Pravilnika.

Član 16.

Konačan uspjeh kandidata na ispitu ocjenjuje se prema pokazanom znanju na ispitu.

Ocjenu uspjeha kandidata na ispitu utvrđuje Komisija većinom glasova.

Uspjeh kandidata na ispitu ocjenjuje se ocjenom „položio“ i „nije položio“.

Član 17.

Kandidat koji nije položio ispit ima pravo ponovnog polaganja u narednom ispitnom roku.

Član 18.

Započeti ispit može se odložiti ako je kandidat zbog bolesti ili drugog opravdanog razloga bio spriječen da polaže ispit.

Komisija odlučuje o odlaganju ispita.

Polaganje odloženog ispita nastavlja se u narednom ispitnom roku.

Ako kandidat ne pristupi polaganju odloženog ispita u roku određenom u stavu 3. ovog člana, smatrat će se da ispit nije položio.

Član 19

Nakon završetka polaganja ispita predsjednik Komisije saopštava kandidatu rezultat ispita.

Član 20.

Kandidatu koji je položio ispit izdaje se uvjerenje o položenom ispitu u roku od petnaest dana od dana polaganja ispita.

Uvjerenje iz stava 1. ovog člana izdaje Ministarstvo na obrascu koji je u prilogu ovog Pravilnika.

Član 21.

O toku polaganja ispita vodi se zapisnik na obrascu koji je sastavni dio ovog Pravilnika.

U zapisnik se unose svi važniji podaci o toku ispita, kao što su:

- naziv i sastav Komisije,
- datum i mjesto održavanja ispita,
- ime i prezime, datum, mjesto rođenja i mjesto prebivališta kandidata.
- pitanja postavljena kandidatu i uspjeh kandidata po ispitnim područjima i u cjelini.

Zapisniku se prilažu i svi priloženi dokumenti uz zahtjev.

Zapisnik potpisuje predsjednik, članovi i sekretar Komisije.

Član 22.

O izdanim uvjerenjima o položenim ispitima Ministarstvo vodi evidenciju-registar.

Registar se vodi u formi knjige koja mora biti uvezana i ovjerena, a stranice označene rednim brojevima.

Registar ovjerava ministar.

U registar se upisuju podaci o kandidatu: ime i prezime, ime roditelja, datum i mjesto rođenja, stručna sprema, datum polaganja ispita, mjesto polaganja, broj i datum izdanog uvjerenja i naziv privrednog društva kod kojeg radi.

Registar iz stava 1. i 2. ovog člana vodi se na obrascu koji je u prilogu ovog Pravilnika.

Registar se čuva kao dokument od trajne vrijednosti.

V PROGRAM ISPITA

Član 23.

Ispitna pitanja se postavljaju iz sljedećih oblasti:

- Eksplozivna sredstva i tehnički propisi o mjerama zaštite pri rukovanju eksplozivnim sredstvima u rudarstvu i drugim objektima gdje se vrši miniranje, sadržano u :
Pravilniku o tehničkim normativima pri rukovanju eksplozivnim sredstvima i miniranju u rudarstvu („Službeni list SFRJ“ br.26/88 i 63/88)
- Prirodne opasnosti u podzemnoj i površinskoj eksploataciji mineralnih sirovina , štetni jamski plinovi, opasne prašine i mjere zaštite od istih, sadržano u :
 - Pravilniku o tehničkim normativima za podzemnu eksploataciju uglja („Službeni list SFRJ“ br.4/89,45/89,3/90 i 54/90);
 - Pravilniku o tehničkim normativima za podzemnu eksploataciju mineralnih sirovina metala i nemetala („Službeni list SFRJ“ br.24/91);
 - Pravilniku o tehničkim normativima za površinsku eksploataciju ležišta mineralnih sirovina („Službeni list SFRJ“ br.4/86 i 62/87);

VI ZAVRŠNE ODREDBE

Član 24.

Ovaj Pravilnik stupa na snagu narednog dana o dana objave u „Službenim novinama Federacije BiH“

Broj: 06-34-2137/10
24.februara. 2011.godine
Mostar

Ministar
mr. sc. Vahid Hećo s.r.

Bosna i Hercegovina
Federacija Bosne i Hercegovine
Federalno ministarstvo energije, rudarstva i industrije

Na osnovu člana 19. Pravilnika o polaganju ispita za samostalno rukovanje eksplozivnim sredstvima („Službene novine Federacije BiH“, broj ____/____) izdaje se:

UVJERENJE

O POLOŽENOM ISPITU ZA SAMOSTALNO RUKOVANJE EKSPLOZIVNIM SREDSTVIMA

_____ rođen-a _____ godine
(ime i prezime)

u _____ polagao-la je stručni ispit za samostalno rukovanje eksplozivnim sredstvima dana _____ 20____. godine pred Komisijom za polaganje ispita i prema ocjeni Komisije

KANDIDAT JE POLOŽIO ISPIT

Uvjerenje se izdaje uz naplatu takse u iznosu od 10 KM u skladu sa Tar. br. 55. Zakona o federalnim upravnim taksama i tarifi federalnih upravnih taksi („Službene novine Federacije BiH“ broj: ____).

MINISTAR

**Bosna i Hercegovina
Federacija Bosne i Hercegovine
Federalno ministarstvo energije, rudarstva i industrije**

Broj: _____
Mjesto i datum: _____

Z A P I S N I K

Pred Komisijom za polaganje ispita za samostalno rukovanje eksplozivnim sredstvima kandidat _____ pristupio-la je polaganju ispita.

Komisija u sastavu

1. Predsjednik _____
2. Član _____
3. Član _____

Kandidatu su postavljena sljedeća pitanja:

Nakon završenog ispita Komisija je odlučila da kandidat _____

Po završenom glasanju o uspjehu kandidatu je saopćeno sljedeće:

Sekretar:

Članovi

1.

2.

Predsjednik

Registar izdatih uvjerenja
po položenom ispitu za samostalno rukovanje eksplozivnim sredstvima

Red. broj	Klasifikacijska oznaka, broj i datum izdavanja Uvjerenja	Ime i prezime kandidata, broj lične karte i mje.izd., JMBG	Datum, mjesec, god. mjesto i drž.rođ. kandidata	Datum polaganja ispita	Napomena
1	2	3	4	5	6

Privredno društvo: _____

Broj : _____

Mjesto i datum: _____

Federalno ministarstvo energije rudarstva i industrije
adresa: _____

Zahtjev

Podnosi se zahtjev za polaganje ispita za samostalno rukovanje eksplozivnim sredstvima- palioca mina kandidata _____ prezime,imeoca,ime _____

Uz zahtjev se prilaže:

1. ovjerena kopija diplome ili svjedodžba o završenoj stručnoj spremi kandidata;
2. potvrda o radnom iskustvu sa podacima gdje i na kojim poslovima je kandidat radio;
3. Ljekarsko uvjerenje za palioca mina;
4. Potvrda o praktično izvršenoj obuci za palioca mina;
5. Potvrda o uplaćenim troškovima polaganja ispita.

pečat i potpis ovlaštene osobe:
